

Upravni odbor Vijeća za provedbu mira izjavio da Mostar treba imati jedinstvenu gradsku upravu

Vijeće za provedbu mira je jučer u Briselu raspravljalo o rezultatima rada Komisije za reformu grada Mostara. Viši zamjenik visokog predstavnika Werner Wnendt je obavijestio Vijeće za provedbu mira da je u okviru Komisije postignuta saglasnost o velikom broju pitanja, što omogućava predsjedavajućem Komisije Norbertu Wintersteinu da do 15. decembra visokom predstavniku dostavi jasne preporuke kojima će se građanima Mostara osigurati jedinstvena gradska uprava zasnovana na najboljim primjerima iz evropske prakse i u skladu sa njom.

U komunikatu koji je izdao, Upravni odbor Vijeća za provedbu mira je naveo da "će pružiti svoju punu podršku u provedbi rješenja koje se odnosi na Mostar, zasnovanog na jedinstvenoj gradskoj upravi i sa efikasnim mehanizmima kojima se garantuje odgovarajuća zastupljenost u organima vlasti i spriječava da bilo koji narod ima većinsku kontrolu u Gradskom vijeću."

Komentirajući raspravu koja se vodila u okviru Vijeća za provedbu mira, visoki predstavnik je danas rekao: "Zemlje članice Upravnog odbora Vijeća za provedbu mira jasno su stavile do znanja da će podržati jedinstven i ujedinjen grad Mostar. Problemi Mostara su na političkom i ekonomskom planu zasjenili posljeratni oporavak BiH u cjelini. Zbog toga Evropska unija očekuje od BiH da probleme Mostara rješava u sklopu procesa evropske integracije. Mostarska komisija se značajno približila rješenju problema, koji već nekoliko godina sprječavaju građane tog grada da vode normalan život.

Dugujemo njima, kao i Bosni i Hercegovini u cjelini, da nastavimo raditi na onome što su oni postigli."

OHR će izložiti svoje stavove o tome kako treba nastaviti proces ujedinjavanja grada Mostara nakon što visoki predstavnik dobije izvještaj gospodina Wintersteina.